



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**Tribunál Distritál Dili**  
*06 Juñu 2016*

**JSMP husu Tribunál atu kondena arguidu ho pena máximu iha kazu abuzu seksuál hasoru labarik sira**

Iha 31 Maiu 2016, Tribunál Distritál Dili kondena arguidu HC ho pena tinan 12 prizaun tanba provadu komete abuzu seksuál dala rua hasoru lezada ne'ebé foin tinan 13 ne'ebé durante ne'e hela ho arguidu. Kazu ne'e akontese iha 07 Setembru 2015, iha tuku 05:00 dader no tuku 20:00 kalan, iha Distritu Likísa.

Tribunál konklui katak arguidu prova kontra artigu 177 (1) Kódigu Penál kona-ba prátika koitu vajinál, koitu anál ka koitu orál ho labarik ne'ebé seidak tinan 14. Krime ne'e ho moldura penál hosi tinan 5 to'o 20 prizaun ho agravaun tuir artigu 182 (1) letra (d) Kódigu Penál. Ne'e signifika katak pena ne'e agrava datoluk-ida tanba arguidu abuzu ninia autóridade familiar ka relasaun ne'ebe fo fatin ba dependénsia ierárkika, ekonómika no laborál.

JSMP hanoin katak sentensa ne'e la atinze pena máximu hosi krime ne'e, tanba pena máximu ne'ebé agrava hosi krime ne'e tuir loloos mak tenke tinan 26 fulan 6 iha prizaun.

Durante prosesu produsaun ba provas, lezada lakohi hato'o nia depoimentu. Mesmu nune'e, tribunál prova faktus sira ne'e bazeia ba arguidu nia deklarasaun ne'ebé deklarata katak nia komete duni krime hasoru lezada. Aleinde ne'e, iha mós prova dokumentál sira seluk hanesan fotografía no relatóriu médiku hosi ospital ne'ebé hatudu katak iha kanek iha lezada nia orgaun seksuál.

Iha tribunál nia akordaun konsidera katak lezada sofre trauma psikolójiku, tanba ne'e lezada rejeita atu fó nia-depoimentu durante prosesu produsaun ba prova.

"JSMP apresia ho tribunál ne'ebé hatudu nia sensibilidade atu konsidera aspetu psikolójiku ne'ebé lezada sofre tanba arguidu nia-hahalok. Mesmu nune'e, JSMP nafatin preukupa tanba pena ne'e la-atinze pena máximu tuir krime nia-gravidade no krime ne'e nia efeitu ba lezada nia sofrimentu psikolójiku ne'ebé nia hetan, " dehan Diretór Ezekutivu JSMP, Luis de Oliveira Sampaio.

JSMP mós kontinua husu ba ministériu públiku no tribunál atu konjuga Lei Kontra Violénsia Doméstika iha kazu sira involve membru família iha uma-laran.

Iha artigu 3 letra (d) Lei kontra Violénsia Doméstika (LKVD) define katak família mak kuálker ema ne'ebé maka hola parte hosi kontestu dependénsia ka ekonómia família nian, inklui sira maka hala'o atividade uma-laran nian ka servisu nian ba bebeik ka husi forma subordinada nian.

LKVD konsidera membru família ida nia relasaun aleinde kaben–nain ka família íntimu sira axendente ka dexendente maibé mós ba kualkér ema ne'ebe hala'o atividade uma laran nian ka hela hamutuk ne'ebé dependénsia ekonómika. Tanba ne'e JSMP hanoin katak kazu ida ne'e tama iha kontekstu família nian no tenki inklui LKVD iha akuzasaun no desizaun.

JSMP mós kontinua husu ba tribunál atu kondena arguidu selu indemnizasaun sivíl ba lezada, nu'udar forma reparasaun no rekoñesementu ida ba lezada nia sofrémentu.

Tuir JSMP nia-hanoin, kestaun presaun no trauma psikolójiku ne'ebé lezada sofre nu'udar konsekuensia hosi relasaun dependénsia entre lezada ba arguidu ne'ebé durante nia hela ba, no dependénsia ekonómika tanba lezada subordinada ba arguidu ka iha arguidu nia responsabilidade. Tuir loloos arguidu iha dever moral atu fó protesau ba lezada hanesan nia ema ne'ebé hela ho nia maibé pelu-kontrariu, arguidu viola fali nia. Fator hirak ne'e mós bele sai razaun ba lezada hodi deside atu la koalia kona-ba faktu sira ne'ebé akontese ba nia-an.

Kazu ne'e rejista iha tribunál ho Nú. Prosesu : 0085/15.LBZT. Julgamentu akordaun ne'e prezide husi representante juis koleтиву, Dra. Albertina Alves. Ministériu Públiku representa husi Dra. Ivonia Guterres no arguidu hetan defeza husi Dr. Manuel Sarmiento hosi Eskritóriu Defensória Públiku.

Atu hetan informasaun kompleitu bele kontaktu ba:

Luis de Oliveira Sampaio  
Diretór Ezekutivu JSMP  
E-mail: [luis@jsmp.minihub.org](mailto:luis@jsmp.minihub.org)